

夏 暘

夏暘家世石工。爲人目不知書，而志行純篤。侍父同寢，必夾父尿器於懷溫之，欲溲即以進。父卒，哀毀逾禮。既葬，奉其主如生，朝夕出入，事無大小，必啓而後行。母患癘疾久，暘侍湯藥，常在左右，未嘗一入妻室，夜不解帶者三年。母嘗思食荔子，暘家城外，夜又大雪，乃倉皇越城叩市肆，肆主憚寒，不時起，暘泣於外，肆主感悟，亟起取付之。暘之子，以小忿爲其弟毆至斃，暘恐傷母心，但含淚不言，人以爲難。

溫父尿器，無異於古之溫席扇枕。父亡，事之如生，大小事必告而行。語稱事亡如事存，夏暘有焉！不謂一石工而乃能如是，知書者當拜下風，若_{中乎}則願爲執鞭。

顧 忻

顧忻以母病，葷辛不入口者十載。雞初鳴，即具冠帶，率妻子，詣母室候安，問其所欲。如此五十年，未嘗離母左右。母老，目不能睹物，忻日夜飲泣祈天，刺血寫表，既而母目忽明，燈下能縫衽，九十餘，無疾而終。

定省而問其所欲，方是實際。